

多
歲
堂
詩
集

多歲堂詩集卷二

長白 成書 倬雲

乙丑上

二月充日講起居注官 三月改二等侍衛充哈密幫辦大臣

四月初四日發都城

不負平生意遂爲萬里行壯遊非落寞佳識太分

余乙卯秋以侍講學士扈蹕灤陽有句云侍

明從慙文學前身應健兒去冬以狂愚左遷蒙

恩待罪翰林重入講筵今又以定省煩兒女家園

武級從軍回憶前詩驚歎無已

託友生先人舊節鉞垂淚事西征

先公鎮哈密五年

天恩收廢棄臣節勵冰霜叱馭寧無志轉輪別

有腸朦朧辭老母恍惚已他鄉古有從軍樂胡余
獨自傷

宿良鄉

去家纔半日愁緒似經年假寐猶醒爾凌晨更惘
然淚滋初別後慮到欲歸前不是長途怯茲行一
念牽

桓侯廟

古柏蕭疎露槿紅桓侯祠廟夕陽中雄威真見萬
人敵禮下何慙國士風畫壁勲名傳稗史歲時祭

祀付村翁樓桑咫尺英靈接一體君臣遺恨同
白衣搖櫓壁天傾懊惱君王起憤兵重地營連干
慮失偏裨表至一軍驚東征誰起法孝直大義惟
欽趙順平成敗論人青史事將軍義勇足平生

麒麟冢

荒壠帶蔓草短碣臨道周云是麒麟墳流傳幾春
秋不知何王代應化來神州皇都亦已近性命不
少留乃知至仁物亦有生死憂故鄉隔萬里遺蛻
委遐陬不如入市馬駿骨千金收不如在梁狐身

死正首邱太息王者瑞隱見必有由生理不可說
驅馬心悠悠

展墓

昔侍單車使曾隨誓墓親那堪卅年後復作遠行
人楮帛承先志松楸仗近鄰兒童有斑白話舊一
酸辛會王父墓在清苑之小激村距都寫遠不能
時謁守墓人歲時致祭而已先公官直隸時
每赴省會輒一往謁祭書皆隨侍及庚子秋出使
哈密書以公車不得從迄今三十年矣今茲奉使
恰是先人舊治便道展謁與鄉人話
舊遭際之奇風木之感不禁淚下

保陽道中

愁極翻成寐思多夢有痕星霜催短鬢風雨羨孤
村客路交情變浮生歲月奔那堪投逆旅寂寞又
黃昏

定州

遠水平沙落日頽勞人懷抱幾時開清風明月定州
古中山清風明月二鎮名無錢買孤負中山千日
杯

酒

我生太平時不謀千日醉直爲性所耽頗復重其

事醇漓顯易見甘苦非所計
領略神韻間乃見酒德備
中山得佳釀味淡色彌粹
芳香與酷烈俱置無用地
唯存古朴性抱此中和氣
譬如高尚士雅度不凌厲
中邊俱有味醉醒同一致
持贈豪飲人澹泊恐見棄
我豈辨淄澠酸鹹在所嗜
定州村釀甚佳氣味
冲澹乃在諸南醞上但力
少薄耳品甚高而才不逮
亦可謂一鄉之善士矣

慕容垂墓

死虎齧臂燕業衰中山嗣
立猶童孩吳王功高才冠
世太原三薦非虛推阿干
歌聲猶在耳胡爲骨

肉相疑猜可足渾后不足道上庸太傳真奴才全
身保族計自有狼狽出走吁可哀郊迎執手稱天
貺符王大度傾心向士庶聚觀龍虎姿英雄已忌
風雲壯占星惡聞張太史佩刀悔貽王丞相寢蛟
藉虎幾經年千人所指終無恙八公草木風蕭蕭
投鞭百萬如冰消全軍授主功不細國士之遇恩
難銷脫身北鄙志已定一門豪俊競相招涼馬臺
邊草復渡老鷹奮翼冲青霄焚亭殺吏聊小試飛
龍豎子安足梟籠中人已無還理餘子紛紛乘間

起關東六州望風降七十老翁作天子瀕死猶矜
囊底智嘔心莫雪參陂恥白骨如山野哭悲中興
霸業嗟已矣阿寶昏庸阿會驕二王喋血家室毀
宣平陵前蔓草荒無人爲酹一杯水榮華一代不
同岑埋骨重泉何處尋毅魄強魂耿猶在渺矣當
年割據心君不見虬髯天子征遼日冢上黃衣尙
苦吟不道偏安遜正統但道君今勝我今

陋室

官職詩名一例收劉郎才地壓凡儔早安陋室崇

馨德何假良朋易惡州簾草階苔餘廢址瘴鄉蠻
語竟長流元都兩度題詩後始憶平生馬少游

生日

是日宿
富城驛

吾年四十六自視如嬰兒生長慈母手未嘗須臾
離每逢懸弧日堂上羅酒卮再拜壽阿母跳跟爲
兒嬉阿母顧之笑慈顏日怡怡服官二十年到處
皆相隨四十五生日歡喜常如斯今年忽奉使乃
在西陲西長驅一萬里瓜代未有時上堂辭阿母
淚落霑裳衣阿母爲我言兒去無淒淒王命不

可留丈夫志驅馳我今幸強健尙可待汝歸諸孫
知孝養病婦能支持况復有兩兄晨昏得所司加
意待僮僕小心調渴飢毋爲放浪飲毋作悲涼詩
賜汝護念佛長途無嶮巇授汝般若經持誦忘憂
危出門方五日又值初度期黃昏到旅舍慘慘中
心悲四顧無一人寒風入重幃孤燈裊爐篆靜對
西方慈見佛如見母膜拜前致詞罷官事則已遠
戍行無疑不願萬戶侯不願千金資但願早歸來
遂此烏鳥私輶軻不遑惜貧病甘如飴躬耕率兒

子努力營餉廩年年過生日日日依親闈

興隆寺

在正定府

興隆古寺城東闔飛樓傑閣凌蒼旻去城十里隔
城見瑞煙籠春光嶙峋升堂昂首仰佛面目光炫
晃疑非真威容廣大屹山立不聞不見師天人我
聞西方聖人教棄置四大如灰塵百千萬億隨化
現涅槃究竟無旁因胡爲範金鑄此像如須彌山
驚凡民金剛妙諦不可說或是非身爲大身憶昔
垂髫曾過此夜深入拜厓心神當年法相具千手

母陀羅臂屈復伸後人重修苦煩重盡去其餘佛
不瞋人生一身止兩手善用其一二俱臻況乃如
來自在力無手亦可拯沉淪八萬四千何爲者作
如是觀非波旬

渡滹沱懷古

兔肩麥飯亦區區感激蕭王厚意殊當日君臣如
父子直披荆棘到桑榆長河落日餘空舍大樹臨
風憶壯圖舊簿來朝恩信著咸陽王號漫相誣

井陘口

很石驚沙灌莽叢韓侯戰壘亂山中左車已作賁
軍將東嚮居然名士風古廟靈旗思易幟斷崖飛
鳥憶藏弓我來立馬傳餐地綿蔓奔流夕照紅

井陘縣

四月井陘道巉巖近故關穴居風俗古野飯稻粱
艱村邑多名井如白井張井
謝井之類人家半在山征夫懷
抱盡那得一開顏

異鄉

異鄉出入境風土亦堪傳水旋樓頭磨人耕屋上

多歲堂詩集

田馬程剛百里雲度有三天

自井陘至平定
州有三天門

不辨

來時路斜陽山萬千

平生

平生邱壑意圖畫覓煙巒近覺看山厭方知行路
難故鄉千里隔客夢五更殘何日返初服乾坤一
釣竿

故關

一樣長途車子班西來那不羨東還都城親友如
相問爲報行人出故關

一謫蓬瀛隔 紫宸輶車日日走風塵關門令尹
知占候可識當年柱下臣

芹泉用趙秋谷韻

雞鳴戒征鞍殘月猶在嶺很石出犖确倦客畏馳
騁徐行得佳境欲過心猶耿平沙埋馬蹄小雨不
作渾回頭看亂山直若脫陷穽少焉天宇闊日出
萬峰頂空翠澗谷陰峭倩竹柏影平溪清見底潔
不容蠹蝨草屋傍山田百家共一井人稀雞犬靜
徑僻荒穢屏田家聚妻孥操作趁朝冷對此念鄉

聞我心更孤迴茲行方未央歸轡何時整輸他田
舍翁飯熟呼不醒

壽陽驛

長途四百里巉巖乍得康莊憶險艱從此不堪回
首望故鄉已隔萬重山

自獲鹿山行四百里
躋攀甚苦至此出山

食新蘿蔔

是日宿
介休

土膏味本勝雞豚况是郵亭敗酒樽春韭秋菘盡
拋卻滿身風露憶南園

靈石縣

曠途三百里復此入山行老屋懸崖置層田逐段
平稻香畦水慢麥秀午風輕再轉坡陀路斜陽放
晚晴

換卻看山眼來從畫裏行平沙宜走馬深樹尚聞
鶯巖暝村煙白河流夕照紅今宵宿何處燈火見
山城

韓侯嶺

靈石已多山邐迤但平遠驅車日亭午漸覺失夷
坦萬山相合沓一徑趨斜阪古轍迂而迴前驅往

復返初忘登陟勞但苦行程緩不知幾曲折高意
猶未顯良久出來壁陡仄又一轉忽然到絕頂大
豁無遮眼青天低近人飛鳥俯可辨適來所見山
培塿不足算山頭萬家邑生聚實繁衍村農富牛
馬市聲聞雞犬米薪與井汲取攜無缺短耕作便
山田不羨平地產西有淮陰祠高冢幕蒼蘚居人
薦椒馨過客奠茶薺當年鐘室戮葬地史未纂何
事千里遙窀穸卜荒巘摩挲讀斷碑考據俚不典
英雄百戰地靈爽無弗踐廟食福斯人俎豆諒非

舛胡爲事穿鑿誣古出杜撰我來乘急傳憑弔意
未展尚恐前途艱鞭馬就長堰須臾羣動息日下
衆山晚行役久忘勞張燈宿空館

謁淮陰侯墓

雲夢歸來灝氣孤真王已失更焉圖生同樊噲真
惆悵手挈陳稀定有無千里歸元良不忍廟碑載傳聞高

帝伐陳稀呂后矯召殺侯傳首於代高祖回軍遇於此遂命葬於山巔是亦想當然語耳一朝

滅族竟何辜奇冤大節誰昭雪惟有狂巫據鼎呼

村釀

十年叨侍從飽諸大官味柘漿析朝醒醇縹荷
殊賜西行懷抱惡此事遂已廢村醪多苦澁強飲
不盡器何意頽憊頃遭此風雲致高嶺水泉厚醞
釀得真氣獨鍾沉鬱性無復糟糯意芬芳發欲盡
酷烈不姿媚微乏蘊藉情奇快乃無對可憐供村
翁名不出市肆有如獨行士至性不餒退雖無名
士風醇意自可醉又如閭里俠猛氣壓儔類齷齪
態盡消對之凜生畏平生樂杯杓甘苦隨所嗜品
評貴冲澹自謂窮酒事忽逢曠世姿前論不復記

連呼沃巨觥徑欲息吾喙乃知酒國大生才不擇
地中行固堪尚奇士亦可貴伯夷與柳下偏造聖
乃至但毋如鄉原甜俗以悅世作詩頌其德醉鄉
有清議嶺頭村釀甚佳酷烈芬芳力甚大但過甜耳如晚唐人許渾杜牧輩雖已失古人醇雅風味而濃至處李杜反似有所不及其氣力降人也是日下嶺宿仁義鎮冷飲數大杯不覺沉醉

逍遙嶺

上山復下山已盡四十里前嶺接後嶺其勢猶未
已晚宿仁義鎮已作平地喜那知在山巔去天原
不咫尺凌晨命僕夫秣馬東行李言尋下山路梢坡

緩鞭弭不意逍遙嶺軒然當面起仰視盤曲道行人如綴蟻始知兩嶺連原未分彼此昨從井底望崇峻已莫比今作疊牀形其高可知矣叱馭使驅之拚無復下理幸值坡陀路我車方可軌徐行辰及午業已忘所以忽臨萬丈坡一下不可止僕夫斂鞅勒轅駒惜蹄趾操縱不自由勢如赴壑水小折或暫阻再轉力彌駛安得驂挂木不禁風生耳良久到平地流汗各相視驚魂亦已定攬轡暫徙倚青蔥望稻田曲折見溪水稍稍聞村雞行行近

城市心憶向時路回顧不敢指

藺相如墓

蔓草荒煙落日曛趙城東畔藺卿墳衝冠一怒歸
完璧刻日三旬復弱君張目已無秦左右引車獨
避廉將軍長卿曠世知相慕何事獨傳封禪文

國士橋

豫子報讐心九死誓無二蕭蕭橋下水盡是酬恩
淚士生感知已成敗固不計律以英雄交斯人尙
可議中行已云滅得主快所事業受非常知寧無

匡救意驕君不備難日有亡國勢高宴侮君相索
地怒韓魏晉陽城上水片語兩國背如何無一言
坐待頭漆器旣愧智國忠亦遜締疵智徒然懷匕
首徇此匹夫義漆身與吞炭艱苦復何濟可以爲
難矣國士或猶未

晚發

旅食又云暮長驅仍戒途晚風衣袖薄落日客心
孤冷暖看郵吏崎嶇問僕夫故園昨有夢不暇憶
妻孥

文中子故里

下馬荒原讀斷碑
河汾處士有叢祠
太平獻策知何補
房魏傳經事可疑
有弟逃爲醉鄉客
遺書僭擬聖人辭
名儒行畧多緣飾
論世知人幾費思

侯馬驛見芍藥

家園已負三春勝
孤驛驚看數朶開
記得去年今夜雨
故人相約到豐臺

鄉心無那付村醪
坐對名花首重搔
四月都門好風日
小藍拖葉賣櫻桃

裴晉公碑

巷邑晉公祠英風郭令齊奇兵付李愬從事得昌
黎河朔功名薄林園卉木萋豐碑瞻道左大筆憶
淮西

趙豐公墓

中興賢宰相投竄悵餘生義在親征決人亡和議
成丹心留諫草浩氣付銘旌一德格天上端應首
著名

汾酒

虛名誤世人今古可笑恥經中有僞書名下無眞士久耳汾酒名意必甘且旨及來思一嘗殊未見可喜枯澹著茅柴矯揉雜菊杞初飲令人愁再飲令人死始疑市僧欺更欲求其似肆翁听然笑謂官可以止是物本無眞何者爲非是自吾食此業五十年於此近沾常百罌遠寄或千里人人信不疑是卽汾酒耳何必徵有無亦無論臧否不見鄉先生尙有文中子

采茶行

自靈石至聞喜民皆採槐葉野菜作糜云麥已生黃不復可望

去年苦旱秋禾傷今年雨多麥生黃蒲津一帶重
地利那能禁此連年荒雖然鄉風尚積蓄節衣縮
食無餘方沒米之炊不能久相與采掇充餽糧苦
茶飴堇不復辨雜以木葉和粃糠老嫗幼女布滿
野稚子隨母提筠筐鳩形菜色不自覺時復嬉笑
牽衣裳唐風儉陋古所咏但知勤苦無悲惶骨肉
團圓聊自慰餓死誓不去故鄉近聞 詔書緩租
賦頓忘飢餒神揚揚但祝秋成穫豐倍驢馱馬載
輸官倉

長途

萬里事行役微軀一葉輕且難期到日不必計行
程見慣曉天月聽殘野店更勞生有如此自爾躁
心平

萵苣

西來見萵苣大如小兒臂土俗不論錢頃筐等遺
棄傳食厭羶腥野飲快所嗜麻油點生醬齒頰有
餘脆故鄉偶一見纖弱不足貴觀此豐且腴頓忘
筍蕨味笑殺杜陵翁旣雨理荒穢生憎人莧青坐

視秋畦廢微祿何足云傷時晚憔悴

司空表聖墓

空山寒有月野菊澹如人一語風流得千秋品藻
真荒墳淒鬼唱落日靜車塵鹵莽傳三昧詩家意
未申

伯兄生日

是日憇尚河郵吏進食
恰得湯餅感而有作

行邁忘程期歲月亦不悉孤岑念骨肉觸境忽有
憶伯氏此月生老病奉微職別來雖未久我歸不
可必家貧寡賓客兒孫自繞膝遙知今夜飲念我

長嘆息館人薦晚餐湯餅雜肉汁彼慙草具微我
喜佳辰直欣然起一飽再拜向空壁呼僮進濁醪
添燭哦新什爲我白髮兄萬里作生日

潼關

邃岸天高澗道隕連雲戰格列崔嵬黃河一曲環
城去華嶽三峯劈面來練卒骨寒桃塞月尙書血
碧柿園苔覆車千載真同轍降虜捐軀盡可哀

楊伯起墓

五十登朝仍素襟肯將衰晚負初心孤忠屢抗回

天疏流俗唯傳暮夜金耿寶有嫌終下石趙騰無
補竟同岑潼亭日落悲風急大鳥沉聲萬木陰

望嶽

關門積宿陰初日猶黯黯清風蕩晨煙嶽色不可
掩三峯拔地起突兀勢非漸青天削芙蓉秋水見
菡萏高撐影矗矗峭刻意斬斬羣山遠羅列趨附
若阿諂森然白帝尊壁立凜莫犯蒼茫古三輔勝
蹟皇圖覽八州會地形兩戒劃天險巨靈擘其拳
一手欲衆攬金天肅殺氣萬古不自貶憶昔曾夢

遊巉巖墮心膽鐵鑊怯攀援石徑記坑坎今來咫尺間阻隔抱深歎巉壑想彷彿臺觀虛指點遙望白雲封萬景入奇斂爲我謝山靈少勇老未減東歸倘如願赴險吾猶敢

嶽祠

潼津直上車隆隆綠楊夾道馳青驄太華可望不可到小憩暫謁金天宮尊嚴廟貌象丹闕人力不逮疑神工入門一徑翳天日列植漢柏兼秦松升階俯首拜深殿心魂謾謾欽聲容巍巍白帝據

黻座神威肅穆尊彌恭衆眞立侍各執事大冠長
劍威儀同十王列廡聚羣鬼或置鼎鑊加磨春窮
姦變怪狀千萬森羅果報驚愚蒙轉屏環柱出殿
後橫廊直互趨深重紅裝十隊肄舞樂修眉秀頰
爭昌丰洞房陰陰窓牖靜畫簾高卷香羅紅衣桁
盥洗紛位置兒襦女舄篋篋充衾枕粲爛煥雲錦
冰綃作帳輕煙籠帝妃端坐燕笑語意態眞有齊
眉風廟令老人事神久房幃曲折無不通手持管
鑰導我入誤驚閨闈心忡忡我聞華嶽作西鎮興

雲降雨參天功惟神正直司肅殺秩宗典禮方三
公眞宰冥漠太虛朕豈有家室相和雍嫁女奪婦
事疊見荒唐誣鱣眞齊東愚民無知好蠱媚遂以
猥褻明尊崇神之所依寧在此誰爲戶喻開盲聾
茶餘扶倦上高閣俯仰百態舒心胸須臾雲散日
卓午晴空劃出三芙蓉

華陰縣

地接弘農右河流清渭東山村紅杏雨城郭綠楊
風嶽影三峯落泉聲百道通行入忘鞍馬竟日畫

圖中

紀信祠

黃屋左纛誑楚爲王功臣第一國士無雙往年殺
韓信前年醢彭越將軍烈焰早捐軀君恩臣節兩
無缺

謁汾陽王廟

整頓乾坤力未頽中興功業邁雲臺坦懷一任軍
容忌減奉寧虞丞相猜坐使羣公如僕隸不妨諸
子盡奴才元臣心事唯憂國白首籌邊涕淚摧

華州橋

是陳希夷
墜驢處

倉卒陳橋擁戴功
屬豬人竟御羣雄
詔書出袖黃袍備
都在先生一笑中

經世才能憫世心
紛紛五代閱升沉
從今無意人間事
一枕清風蝶夢深

齊雲樓

太華中蟠渭水東
君王樓上憶英雄
當年若料蒙塵事
早向高臺歌大風

秦宮回首淚痕斑
陌上行人去竟還
猶勝江南歸

命主新詞徒唱念家山

寇萊公里

一代偉人剩故邱道旁修竹令人愁
澶淵御蓋悲孤注乾祐天書恨贅疣
已負門生成下策那堪樽酒洩深謀
拂鬚參政忘恩久忍向居停議遠州

段太尉祠

倒用司農印聊紆行在憂十門猶列禁
一笏已千秋大節存青史高文說柳州
何岐應配食義烈念同仇

臨潼

東山遙望氣洪濛
蟠螭驪宮御榻空
失職少陵歸興盡
蹇驢破帽走西風

湯泉

松柏漫山曲徑長
華清宮址帶斜陽
玉蓮花折龍香渺
密石猶存太子湯

西安府

三輔蒼茫馳道平
關中八水舊神京
羽林列校開雄鎮
幕府高牙據子城
河嶽光華王氣聚
漢唐陵

墓野煙生終南秀色橫千古滿眼興亡閱幾更

二十八日發西安冒雨渡澧渭過咸陽晚抵
醴泉縣漏三下矣漢唐舊跡都不及訪悵然

賦此

少小閱方輿頻年事幽討未到思夢遊經過快眼
飽西行乘急傳一往如電掃探尋肯暫遺挂漏實
不少長安帝王都勝迹猶可考無計得淹留此心
殊未了衝泥渡澧渭煙雨錯昏曉何者秦漢墟但
見咸陽草醴泉雖舊名廢置亦莫表回頭望終南

雲氣白浩浩九嶷在何許想像離宮繞作賦樊川
才傷時杜陵老憑弔幾流連奇文善窈窕而我獨
奔馳風雨夜失道野黑天如磐籠燈滅已早倉黃
失僕從錯莫認城堡人昏迷嚮往泥滑愁傾倒性
命亦須臾中懷那得好平生好古心竟日窮途惱
三更到旅舍疲餒色枯槁歸遊定何時空手惜餘
寶

監軍驛

遊子三更夢高堂萬里心山川情不隔風雨感何

深古壁殘燈暗遙村夜柝沈微生悲寸草起坐一
霑巾

邠州太王祠

古公舊祠宇零落古城隍此日方憂狄何心更翦
商荒庭秀荼堇耆老薦蒸嘗薄暮看歸市前王信
不忘

邠州范文正公故治

徒抱良醫濟世情區區環慶著功名男邦帳下兩
狂賊老子胸中萬甲兵已陷危幾輕去住更堪讒

口詆紛更一麾仍作邊城將憂樂關心志未平

大佛閣

發邠州二十里大佛閣唐鄂公敬德建較正定者更極莊嚴

天匠鑿山骨須彌大身現石龕就絕壁萬古坐安
晏三十六莊嚴相好無闕欠洞天如覆孟華蓋象
高殿崇基障其前綺閣罩空藉神工渾無迹外視
不可見山根盤磴道曲折若微線攀援到層巔肅
立對佛面憑欄一俯視耳目倏驚眩諸天皆在下
龍象入深斂空蒙石氣青虛白瑞光遍不知幾由
旬發地出奇獻法居八十尺趺坐有餘羨一粒頑

石中世界現窮變惜哉石溜穿歲久波浪濺蓮座
半莓苔香華失寶綯傳聞鄂忠武駐節此營建古
人多驚力興作見雄擅功成深閉門禪觀愜所願
我今亦何爲歲月付郵傳微軀輕落葉浪迹惜流
電稽首不動尊勞生行已倦

白水驛

使者西來乘急傳亭午到驛未朝飯急呼盤餐催
換馬驛子叩頭面流汗自言此驛當要衝騎馱廩
餼非時供當年廐馬七十匹官虧差斃棚槽空堂

上新來能事者但食馬乾不買馬倉卒應付有奇
術要截途人派里下使君安坐幸無怒願備饘粥
典敝袴縣尊已知會有處管取過行遲不誤須臾
傳呼縣役來沿途捕捉應官差車戶頓足行客泣
拋囊輸載相求哀徑驅羸馬意閒暇深閉驛門索
高價瘦馬三百肥一千得錢卽放餘不赦黃昏擾
攘至夜半腰橐已盈人盡散使者忍飢待天明仍
騎昨日疲馬行

瓦亭

好水川西戰鼓悲六盤山下陣雲垂前軍誤發銀
泥合萬衆驚看鮑老旗當日張吳真狡獪一時韓
范竟參差監軍一旅成何濟馬首衣錢哭健兒

六盤山

我從潼津來高視見華嶽西行山不斷培塿苦無
卓晨發瓦亭驛馬足漸犖塉六盤當我前注目一
錯愕高標勢窮崇橫亘氣磅礴屹然羣嶽外坦率
無倚薄直上稍縈紆旁行失陡惡大車樂方軌徒
步任遠壑峰巒相迴帶盤道仍闊綽不似諸小山

鋒棱矜險嶸時當仲夏亥小雨未沾渥前登氣候
變風雪浩漠漠山頭古亭障隱映若城郭憶昨百
里外已見此樓閣驅車下山路風雨又間作下視
隆德城咫尺渺村落茲行足壯觀迴首氣蕭索慘
澹龍蛇窟深藏歎冥冥

山溪

青家驛西俗名七十二道脚不乾

兩山夾穹崇一水自出沒不知何處來當道苦橫
決沙疎石有隙縱橫任衝齧遂令半溪流散作百
曲折西行路必經間道不可越輪轄濕不膏我僕

棄履韞俄頃幾揭厲數步一撇烈途窮遭戲弄沾
灑向誰說山溪亦尋常深廣才丈尺苟能順其性
沿山去無迹胡爲與人爭來往斷車轍山靈不無
意結幻誤行客從來輒軻境萬變一綽楔所貴清
其源險夷無差別吾將尋濫觴九泥塞窟穴羣流
失泛溢大地自光潔何有行路難高天靜寥泐

青嵐山

青嵐無片石厥土惟黃壤但苦泥淖滑不畏道里
長我行幸晴旭登頓殊未央方升千丈坡忽下萬

仞岡前山望益高峰巒次低昂西行所必經仰視
心徬徨故老爲余言此路非周行疏鑿歲未久行
旅來相望北有廢盤道風雨摧橋梁棄置無人修
蕪穢榛棘荒衆情趨便捷履險忘憂惶苟能復故
道百里如康莊感此良歎息世事不可詳誰爲限
通塞岐路悲亡羊

青嵐山絕頂小憩

夙乏雲霄志徒多登降勞亦知平地穩祇是近天
高緩步從吾好爭途怪爾曹羨他山下子茅屋置

身牢

車道嶺

久役怯登陟厭聞山谷名及來車道嶺澹然心意
寧初行稍偃蹇旣上已坦平倦僕叱羸駟忽若羽
翼生古轍迹不亂山田牛得耕悠悠驅車去忘在
山上行野人半穴居乍見時一驚窘水售行客陶
枕濁復清涼漿點石蜜色若秋江萍臭味不足辨
甚渴勉一傾日暮見山驛人馬雜市聲相去數里
間喧靜乃逕庭念彼淳樸俗復此塵事縈蒼茫行

路難慘澹遊子情

蘭州府

蘭州唐列郡節度歸瓜沙河湟屢得失銀夏多紛
拏熙朝建幕府番漢成一家屹然名都會繁富
如京華大河東流去浮梁鬱杙材高城填華屋燈
火鳴箏琶西域五十國職貢連輜車拳髭與黑齒
靜肅無喧譁至德示懷柔道不遺荒遐何嘗勤
遠畧疆域二萬賒使臣將王命欲食燉煌瓜道
路無梗塞行李相嫖誇安行若鄉里不擇時日嘉

多歲堂詩集

笑彼博望封鑿空事浮槎

沙井驛

朝發臯蘭縣暮宿沙井灣
泝流水滔滔躡石車班
班高下無定途人馬愁
牽攀峰迴路欲盡奇境
開我顏一山數十峰
峰峰立巉巖夕陽落高
頂五采生斑斕削如巨
斧揚燦若靈芝含雖無
泉石潤秀色不可刪
河隴草木稀枯寂意不
堪誰將沙土質幻此金
碧山天工真豪縱播弄
風塵間持此慰旅愁
前途猶險艱

苦水

稻畦麥隴綠灣環
竟日清風翠靄間
恰似圓明
趨值散柳陰隔水看西山

平番縣

卽莊浪有
駐防滿兵

河湟古要地前代羌戎俱漢則罕开備唐惟吐番
虞神武混六合重鎮親兵需平番及鎮羌嘉名
見良圖我來莊浪道小憩城東隅相逢少年子揭
武貌甚都臂鷹復挾彈徵逐遊通衢知是故鄉人
下馬問所居方音雖却變豪氣尚敷腴自云占戊

久存沒相乘除邊疆靜烽燧豐歲多儲精身閒髀
肉生日久弓刀疎飽食已自悔豈復思鄉閭感此
氣頗壯驅車就長途丈夫志萬里庸人守舊廬何
鄉非樂土况乃免荷殳許身臣子節遠近 恩豈
殊

鎮羌道中效杜工部俳諧體

異俗見已屢莊浪達古浪威靈感雷祖廟貌祀牛
王蘆酒味偏澹豪豬色正黃尤憐小兒女炫服鐵
銀鐺

涼州府

藉甚涼州郡風流迹已陳蒲桃來刺史書記老詩
人地考昆彌舊兵屯禁旅新清燈靜高館羌笛
夜何頻

永昌早發

烏梢嶺過擬兼程厯盡崎嶇仍不平未免憚勞朝
意頗無多僕從客心驚山風吹面作芒刺水石與
人爭道行纔見殊方風候異羊裘六月著身輕

甘州道中

五月甘州道西風撲面塵近村微有樹竟日不逢
人瀚海沙聲惡天山雪色新玉關亭障近回首憶
楓宸

峽口

向夕陰風來亂山漸蕭索兩峰忽相參再轉境彌
惡峽深天欲斷道窄壁如削陰崖無草木盛夏亦
光濯狼石積鐵黝奇狀獻斧鑿負嵎猛虎蹲作勢
厲鬼攫濛濛黃霧映慘慘白日落久役亂驚魂畏
途愁病脚出峽稍平曠石轍猶羊确神傷自昔然

何心記邱壑

高台縣

高台無土著流寓多南人家世傳釀法往往能遇
真西行無佳醞此味亦足珍微嫌氣質麤不厭斟酌
頻啣杯微妙理此事蓋有因水者酒之骨髓蘖
發其神節香與擣粹矯作乃不倫沙泉雖甘美土
薄氣未純况與鹽池近斥鹵奪清淳所以五齊備
未臻千日醇萬事失其本徒勞空效顰老夫適萬
里將飲青田春對此亦暫爾饒舌成波旬

鹽池驛

鹽池亙數里堆岸如雪山鹵性溢地出夾道白巉
巉土商領現引轉運數縣間正課歲三百輸納吏
所監貧民覲升斗偷漏亦不慳上免國賦缺下
免澹食艱何如淮揚賈巨億富神姦

肅州

長林互陰森孤城半隱現活活水通渠厯厯山當
面酒泉古名郡勝迹殊未變流澗百里間草木盡
葱蒨城中賢刺史蕊榜昔同薦別離三十載絕域

此相見明燈啟重門置酒諧高宴宦途識古道旅
況驚深眷爲我具餽糧囊橐有餘羨明日出陽關
無復故人戀

嘉峪關

至德不在險玉門西域半嘉峪非舊關屹鎮侔壯
觀本朝富土境職貢道無難新疆二萬里發軔
自此算虎頭英雄人生入屢興歎豈知盛明世
出入若閤閤人言此墮淚回首增淒斷我視猶戶
庭無爲怯衰懦

惠回堡小山

出關未百里山遠目已閒平沙浩無際空蕩殊不
堪晨抵惠回堡推窓見孤嵐四望無倚著獨立戈
壁間嵌空入刻畫高撐絕躋攀羣峰三十六排列
紛相參森如五指羅燦若羣星園奇秀不可名妥
帖生巉巖是時天宇曠遮目無榛菅恍如烏皮几
安置海嶽山造化富異製不爲絕域慳脩然天地
外竟日煙霞酣瓜沙盛礦藏商賈多窮探慎勿產
黃金誨盜來姦貪

赤金峽

赤金無大山峽口多怪石前朝蒙古衛疆域遞沿
革叛服亦不常 聖朝示威格虎臣秉 廟謀驅
逐得長策番帳盡外徙流民乃占籍通年稍生聚
亦未富田宅行人謀午餐六月見新麥飽食戒車
徒前行沙磧白

大漠

路出陽關盡雲垂大漠空鄉心無畔岸世界見洪
濛匝地驚沙白熏天落日紅輶車輕一葉愁殺不

周風

安西州

絕塞天山外
荒城葱嶺東
將軍留白羽
都護愛青驄
聖代唯崇德
前人枉鑿空
玉門非舊路
回首歎飄蓬

星星峽

亂山隱孤驛
疊壁紛縱橫
居人無數家
土窟依山棚
傳言最高頂
隕石來星精
每當風雨夜
湏洞天宇傾
悄然一燈出
散作千山明
須臾復歸去
隱隱

如有聲恢奇斯可怪疑信還相并豈真鬼物憑或
與山靈爭大漠無濃陰微雨流俗驚我欲窮其說
奈此終年晴

紅山子

爲避騎陽徹夜行長途約略已深更分明二十年
前夢獨坐沙場看月明

戈壁

戈壁望雪山相去無十里山頭雪未消壁中人喝
死

格子煙墩

泱泱平沙夜氣溫
輶車破曉見孤村
名王負弩前驅肅
使者臨邊節制尊
鐵蹄萬蹄沙苑馬
金城千里趙公屯
時平不作封侯夢
吟徧風煙古玉門

長流水

又見人煙聚
稍憐沙水清
平林交夏氣
高館澹離情
迢遞三年戍
間關數月程
西來故人少
誰與話平生

黃蘆岡

沙草粘天落日曛
伊城鼓角隔宵聞
邊民爭識新
都護遺老能言舊
使君未報殊恩輕
絕域近編家集續
從軍黃蘆岡上秋
風起獨倚危樓看
暮雲

